

Littara 'i l'emigranti

Pubblicato: Martedì 14 Luglio 2009

LITTARA 'I L' EMIGRANTI

Cara muggghieri, eccu ca ti scrivu,
I 'sta cittati ricca e scunsulata,
Adduvi mi sbattiu fortuna 'ngrata
E staju menzu mortu e menzu vivu.

Lavuru com'ebreu e comu tali
Mi guardanu e mi trattanu 'sti genti;
Comu quasi ca fussi discendenti
Non tantu 'i l'omu quantu 'i l'animali.

Ed'eu, mparatu u staju tra l'amici,
U ndi cuntamu i peni e li sospiri
E mu ndi cunortamu nto patiri,
Suffru, muggghieri, quanto non si dici.

Mi veni 'a tentazioni, ogni mumentu,
U pigghiu 'u trenu, 'u scappu a casa mia,
U m'abbrazzu i figghioli, u basu a ttia,
U mi viju c'amici e pemmu sentu

'A pecora ch'abbrama e la cummari
Chi currija 'a gaijna oppure 'u cani
Chi giranu p'a casa morti 'i fami;
U larzu l'occhi e pemmu viju 'u mari,

L'arhuri, i strati, i casi d'u pajisi,
I voi cu carru chinu di fascini,
'A hijocca chi difendi i pulicini,
Genti chi ciangi o chi hijacca d'arrisi,

Chi ti guarda, ti parra, ti saluta,
E senti ca ndai 'n'anima, 'nu cori,
E ca non si' 'nu pezzu 'i 'nu motori.
Ma poi mi votu e ti viju seduta

Chi ripezzi 'a cammina o li carzuni,
E pensi ch'è stutatu u focularu,
E stai passandu 'n'antru jornu amaru,
Senza 'nu tozzu 'i pani 'nto casciumi.

Mi scordu 'u trenu e cu' cori ncajatu,
Ricogghiu i quattro sordi chi pigghiavi,
Ti scrivu 'u vaglia e u basu. T' 'u mandavi.
Mughieri mia, 'i lagrimi nzuppatu.

Redazione VareseNews
redazione@varesenews.it